

四庫全書

史部

欽定四庫全書

隋書卷五十三

唐 特 進 臣 魏 徵 上

列傳第十八

達奚長儒

達奚長儒字富仁代人也祖俟魏定州刺史父慶驃騎
大將軍儀同三司長儒少懷節操膽烈過人十五襲爵
樂安公魏大統中起家奉車都尉周太祖引為親信以

質直恭勤授大都督數有戰功假輔國將軍累遷使持節撫軍將軍通直散騎常侍平蜀之役恒為先鋒攻城野戰所當必破之除車騎大將軍儀同三司增邑三百戶天和中除渭南郡守遷驃騎大將軍開府儀同三司從帝平齊遷上開府進爵成安郡公邑千二百戶別封一子縣公宣政元年除左前軍勇猛中大夫後與烏丸軌圍陳將吳明徹於呂梁陳遣驍將劉景率勁勇七千來為聲援軌令長儒逆拒之長儒於是取車輪數百繫

以大石沉之清水連轂相次以待景軍景至船艦礙輪
不得進長儒乃縱奇兵水陸俱發大破之俘數千人及
獲吳明徹以功進位大將軍尋授行軍總管北巡沙塞
卒與虜遇接戰大破之高祖作相王謙舉兵於蜀沙氏
上柱國楊永安扇動利興武文沙龍等六州以應謙詔
長儒擊破之謙二子自京師亡歸其父長儒並捕斬之
高祖受禪進位上大將軍封蘄春郡公邑二千五百戶
開皇二年突厥沙鉢略可汗并弟葉護及潘那可汗衆

十餘萬寇掠而南詔以長儒為行軍總管率衆二千擊之過於周槃衆寡不敵軍中大懼長儒慷慨神色愈烈為虜所衝突散而復聚且戰且行轉鬪三日五兵咸盡士卒以拳歐之手皆見骨殺傷萬計虜氣稍奪於是解去長儒身被五瘡通中者二其戰士死傷者十八九突厥本欲大掠秦隴既逢長儒兵皆力戰虜意大沮明日於戰處焚屍慟哭而去高祖下詔曰突厥猖狂輒犯邊塞犬羊之衆彌亘山原而長儒受任北鄙式遏寇賊所

部之內少將百倍以晝通宵四面抗敵凡十有四戰所向必摧兇徒就戮過半不反鋒刃之餘亡魂竄迹自非英威奮發奉國情深撫御有方士卒用命豈能以少破衆若斯之偉言念勲庸宜隆名器可上柱國餘勲迴授一子其戰亡將士皆贈官三轉子孫襲之其年授寧州刺史尋轉廊州刺史母憂去職長儒性至孝水漿不入口五日毀悴過禮殆將滅性天子嘉歎起為夏州總管三州六鎮都將事凶奴憚之不敢窺塞以病免又除襄

州總管在職二年轉蘭州總管高祖遣涼州總管獨孤
羅原州總管元襄靈州總管賀若誼等發卒備胡皆受
長儒節度長儒率衆出祁連山北西至蒲類海無虜而
還復轉荊州總管三十六州諸軍事高祖謂之曰江陵
要害國之南門今以委公朕無慮也歲餘卒官謚曰威
子嵩大業時官至太僕少卿

賀婁子幹

賀婁子幹字萬壽本代人也隨魏氏南遷世居闕右祖

道成魏侍中太子太傅父景賢右衛大將軍子幹少以
驍武知名周武帝時釋褐司水上士稱為強濟累遷小
司水以勤勞封思安縣子俄授使持節儀同大將軍大
象初領軍器監尋除秦州刺史進爵為伯及尉迴作亂
子幹與宇文司錄從韋孝寬討之遇賊圍懷州子幹與
宇文述等擊破之高祖大悅手書曰逆賊尉迴敢遣蟻
衆作寇懷州公受命誅討應機蕩滌聞以嗟贊不易可
言丈夫富貴之秋正在今日善建功名以副朝望也其

後每戰先登及破鄴城與崔弘度逐迴至樓上進位上
開府封武川縣公邑三千戶以思安縣伯別封子皎開
皇元年進爵鉅鹿郡公其年吐谷渾寇涼州子幹以行
軍總管從上柱國元諧擊之功最優詔褒美高祖慮邊
塞未安即令子幹鎮涼州明年突厥寇蘭川子幹率衆
拒之至可洛碣山與賊相遇賊衆甚盛子幹阻川為營
賊軍不得水數日人馬甚散縱擊大破之於是冊授子
幹為上大將軍曰於戲敬聽朕命唯爾器量開明志情

強果任經武將勤績有聞往歲凶醜未寧屢驚疆場拓
土靜亂殊有厥勞是用崇茲賞典加此車服往欽哉祇
承榮冊可不慎歟徵授營新都副監尋拜工部尚書其
年突厥復犯塞以行軍總管從實榮定擊之子幹別路
破賊斬首千餘級高祖嘉之遣通事舍人曹威齎優詔
勞勉之子幹請入朝詔令馳驛奉見吐谷渾復寇邊西
方多被其害命子幹討之馳驛至河西發五州兵入掠
其國殺男女萬餘口二旬而還高祖以隴西頻被寇掠

甚患之彼俗不設村塢勅子幹勒民為堡營田積穀以備不虞子幹上書曰比者兇寇侵擾蕩滅之期匪朝夕伏願聖慮勿以為懷今臣在此觀機而作不得準詔行事且隴西河右土曠民稀邊境未寧不可廣為田種比見屯田之所獲少費多虛役人功卒逢踐暴屯田踈遠者請皆廢省但隴右之民以畜牧為事若更屯聚彌不獲安只可嚴謹斥候豈容集人聚畜請要路之所加其防守但使鎮戍連接烽候相望民雖散居必謂無慮

高祖從之俄而虜寇岷洮二州子幹勒兵赴之賊聞而遁去高祖以子幹曉習邊事授榆關總管十鎮諸軍事歲餘拜雲州刺史甚為虜所憚後數年突厥雍虞間遣使請降并獻羊馬詔以子幹為行軍總管出西北道應接之還拜雲州總管以突厥所獻馬百匹羊千口以賜之乃下書曰自公守北門風塵不警突厥所獻還以賜公母憂去職朝廷以榆關重鎮非子幹不可尋起視事十四年以病卒官時年六十高祖傷惜者久之賻縑千

匹米麥千斛贈懷魏等四州刺史謚曰懷子善柱嗣官
至黔安太守子幹兄詮亦有才器位至銀青光祿大夫
鄴純深三州刺史北地太守東安郡公

史萬歲

史萬歲京兆杜陵人也父靜周滄州刺史萬歲少英武
善騎射驍捷若飛好讀兵書兼精占候年十五值周齊
戰於芒山萬歲時從父入軍旗鼓正相望萬歲令左右
趣治裝急去俄而周師大敗其父由是竒之武帝時釋

褐侍伯上士及平齊之役其父戰沒萬歲以忠臣子拜
開府儀同三司襲爵太平縣公尉迴之亂也萬歲從梁
士彥擊之軍次馮翊見群鴈飛來萬歲謂士彥曰請射
行中第三者既射之應弦而落三軍莫不悅服及與迴
軍相遇每戰先登鄴城之陣官軍稍却萬歲謂左右曰
事急矣吾當破之於是馳馬奮擊殺數十人衆亦齊力
官軍乃振及迴平以功拜上大將軍介朱勳以謀反伏
誅萬歲頗相關涉坐除名配敦煌為戍卒其戍主甚驍

武每單騎深入突厥中掠取羊馬輒大剋獲突厥無衆寡莫之敢當其人深自矜負數罵辱萬歲萬歲患之自言亦有武用戍主試令馳射而工戍主笑曰小人定可萬歲請弓馬復掠突厥中大得六畜而歸戍主始善之每與同行輒入突厥數百里名讐北夷竇榮定之擊突厥也萬歲詣轅門請自効榮定數聞其名見而大悅因遣人謂突厥曰士卒何罪過令殺之但當各遣一壯士決勝負耳突厥許諾因遣一騎挑戰榮定遣萬歲出應

之萬歲馳斬其首而還突厥大驚不敢復戰遂引軍而去由是拜上儀同領車騎將軍平陳之役又以功加上開府及高智慧等作亂江南以行軍總管從楊素擊之萬歲率衆二千自東陽別道而進踰嶺越海攻陷溪洞不可勝數前後七百餘戰轉鬪千餘里寂無聲問者十旬遠近皆以萬歲為沒萬歲以水陸阻絕信使不通乃置書竹筒中浮之於水汲者得之以言於素素大悅上其事高祖嗟歎賜其家錢十萬還拜左領軍將軍先是

南寧夷爨翫來降拜昆州刺史既而復叛遂以萬歲為
行軍總管率眾擊之入自蜻蛉川經弄凍次小勃弄大
勃弄至於南中賊前後屯據要害萬歲皆擊破之行數
百里見諸葛亮紀功碑銘其背曰萬歲之後勝我者過
此萬歲令左右倒其碑而進度西二河入渠濫川行千
餘里破其三十餘部虜獲男女二萬餘口諸夷大懼遣
使請降獻明珠徑寸於是勒石頌美隋德萬歲遣使馳
奏請將翫入朝詔許之爨翫陰有二心不欲詣闕因賂

萬歲以金寶萬歲於是捨翫而還蜀王時在益州知其受賂遣使將索之萬歲聞而恚以所得金寶沉之於江索無所獲以功進位柱國晉王廣虛衿敬之待以交友之禮上知為所善令萬歲督晉府軍事明年翫復反蜀王秀奏萬歲受賂縱賊致生邊患無大臣節上令窮治其事事皆驗罪當死上數之曰受金放賊重勞士馬朕念將士暴露寢不安席食不甘味卿豈社稷臣也萬歲曰臣留翫者恐其州有變留以鎮撫臣還至瀘水

詔書方到由是不將入朝實不受賂上以萬歲心有欺
隱大怒曰朕以卿為好人何乃官高祿重翻為國賊也
顧有司曰明日將斬之萬歲懼而服罪頓首請命左僕
射高潁左衛大將軍元旻等進曰史萬歲雄略過人每
行兵用師之處未嘗不身先士卒尤善撫御將士樂為
致力雖古名將未能過也上意少解於是除名為民歲
餘復官爵尋拜河州刺史復領行軍總管以備胡開皇
末突厥達頭可汗犯塞上令晉王廣及楊素出靈武道

漢王諒與萬歲出馬邑道萬歲率柱國張定和大將軍
李藥王楊義臣等出塞至大斤山與虜相遇達頭遣使
問曰隋將為誰候騎報史萬歲也突厥復問曰得非敦
煌戍卒乎候騎曰是也達頭聞之懼而引去萬歲騎追
百餘里乃及擊大破之斬數千級逐北入磧數百里虜
遁逃而還楊素害其功因譖萬歲云突厥本降初不為
寇來於塞上畜牧耳遂寢其功萬歲數抗表陳狀上未
之悟會上從仁壽宮初還京師廢皇太子窮東宮黨與

上問萬歲所在萬歲實在朝堂楊素見上方怒因曰萬
歲謁東宮矣以激怒上上謂為信然令召萬歲時所將
士卒在朝稱寃者數百人萬歲謂之曰吾今日為汝極
言於上事當決矣既見上言將士有功為朝廷所抑詞
氣憤厲忤於上上大怒令左右擗殺之既而悔追之不
及因下詔罪萬歲曰柱國太平公萬歲拔擢委任每總
戎機徃以南寧逆亂令其出討而昆州刺史爨翫包藏
逆心為民興患朕備有成勅令將入朝萬歲乃多受金

銀違勅令住致變翫尋為反逆更勞師旅方始平定所
司檢校罪合極刑捨過念功恕其性命年月未久即復
本官近復總戎進討蕃裔突厥達頭可汗領其兇衆欲
相拒抗既見軍威便即奔退兵不血刃賊徒瓦解如此
稱捷國家盛事朕欲成其勲庸復加褒賞而萬歲定和
通簿之日乃懷姦詐妄稱逆面交兵不以實陳懷反覆
之方弄國家之法若竭誠立節心無虛罔者乃為良將
至如萬歲懷詐要功便是國賊朝憲難虧不可再捨死

之日天下士庶聞者識與不識莫不寃惜之萬歲為將
不治營伍令士卒各隨所安無警夜之備虜亦不敢犯
臨陣對敵應變無方號為良將有子懷義

劉方

馮昱
楊武通

王樹
陳永貴

李充
房兆

劉方京兆長安人也性剛決有膽氣仕周承御上士尋
以戰功拜上儀同高祖為丞相方從韋孝寬破尉迴於
相州以功加開府賜爵河陰縣侯邑八百戶高祖受禪
進爵為公開皇三年從衛王爽破突厥於白道進位大

將軍其後歷甘瓜二州刺史尚未知名仁壽中會交州
俚人李佛子作亂據越王故城遣其兄子大權據龍編
城其別帥李普鼎據烏延城左僕射楊素言方有將帥
之略上於是詔方為交州道行軍總管以度支侍郎敬
德亮為長史統二十七營而進方法令嚴肅軍容齊整
有犯禁者造次斬之然仁而愛士有疾病者親自撫養
長史敬德亮從軍至尹州疾甚不能進留之州館分別
之際方哀其危篤流涕嗚咽感動行路其有威惠如此

論者稱為良將至都隆嶺遇賊二千餘人來犯官軍方遣營主宋纂何貴嚴額等擊破之進兵臨佛子先令人諭以禍福佛子懼而降送於京師其有桀黠者恐於後為亂皆斬之尋授驩州道行軍總管以尚書右丞李綱為司馬經略林邑方遣欽州刺史甯長真驩州刺史李暈上開府秦雄以步騎出越常方親率大將軍張憇司馬李綱舟師趣北景高祖崩煬帝即位大業元年正月軍至海口林邑王梵志遣兵守險方擊走之師次闍黎

江賊據南岸立柵方盛陳旗幟擊金鼓賊懼而潰既度江行三十里賊乘巨象四面而至方以弩射象象中瘡却蹂其陣王師力戰賊奔於柵因攻破之俘馘萬計於是濟區粟度六里前後逢賊每戰必擒進至大緣江賊據險為柵又擊破之逕馬援銅柱南行八日至其國都林邑王梵志棄城奔海獲其廟主金人污其宮室刻石紀功而還士卒脚腫死者十四五方在道遇患而卒帝甚傷惜之乃下詔曰方肅承廟略恭行天討飲冰逾邁

視險若夷摧鋒直指出其不意鯨鯢盡殪巢穴咸傾役
不再勞肅清海外致身王事誠績可嘉可贈上柱國盧
國公子通仁嗣開皇時有馮昱王擢李充楊武通陳永
貴房兆俱為邊將名顯當時昱擢並不知何許人也昱
多權略有武藝高祖初為丞相以行軍總管與王誼李
威等討叛蠻平之拜柱國開皇初又以行軍總管屯乙
弗泊以備胡突厥數萬騎來掩之昱力戰累日衆寡不
敵竟為虜所敗亡失數千人殺虜亦過當其後備邊數

年每戰常大克捷擢驍勇善射高祖以其有將帥才每以行軍總管屯兵江北禦陳寇數有戰功為陳人所憚伐陳之役及高智慧反攻討皆有殊績官至柱國白水郡公充隴西成紀人也少慷慨有英略開皇中頗以行軍總管擊突厥有功官至上柱國武陽郡公拜朔州總管甚有威名為虜所憚後有人譖其謀反徵還京師上譴怒之充性素剛遂憂憤而卒武通弘農華陰人性果烈善馳射數以行軍總管討西南夷每有功封白水郡

公拜左武衛大將軍時党項羌屢為邊患朝廷以其有威名歷岷蘭二州總管以鎮之後與周法尚討嘉州叛獠法尚軍初不利武通率數千人為賊斷其歸路武通於是東馬懸車出賊不意頻戰破之賊知其孤軍無援傾部落而至武通轉鬪數百里為賊所拒四面路絕武通輕騎接戰墜馬為賊所執殺而噉之永貴隴右胡人也本姓白氏以勇烈知名高祖甚親愛之數以行軍總管鎮邊每戰必單騎陷陣官至柱國蘭利二州總管封

北陳郡公兆代人也本姓屋引氏剛毅有武略頗為行
軍總管擊胡以功官至柱國徐州總管並史失其事

史臣曰長儒等結髮從戎俱有驍雄之略總統師旅各
擅禦侮之功長儒以步卒二十抗十萬之虜師殲矢盡
勇氣彌厲壯哉子幹西涉青海北臨玄塞胡夷懾憚烽
候無警亦有可稱萬歲實懷智勇善撫士卒人皆樂死
師不疲勞北却匈奴南平夷獠兵鋒所指威驚絕域論
功仗氣犯忤貴臣偏聽生姦死非其罪人皆痛惜有李

廣之風焉劉方號令無私治軍嚴肅克剪林邑遂清南海徼外百蠻無思不服凡此諸將志烈過人出當推轂之重入受爪牙之寄雖馬伏波之威行南裔趙充國之聲動西羌語事論功各一時也

隋書卷五十三

欽定四庫全書

隋書卷五十四

唐 特 進 臣 魏 徵 上

列傳第十九

王長述

王長述京兆霸城人也祖羅魏太尉父慶遠周淮州刺史長述幼有儀範年八歲周太祖見而異之曰王公有此孫足為不朽解褐員外散騎侍郎封長安縣伯累遷

撫軍將軍銀青光祿大夫太子舍人長述早孤少為祖
罷所養及罷薨居喪過禮有詔褒異之免喪襲封扶風
郡公邑三千戶除中書舍人修起居注改封龍門郡公
從子謹平江陵有功增邑五百戶周受禪又增邑通前
四千七百戶拜賓部大夫出為晉州刺史轉玉壁總管
長史尋授司憲大夫出拜廣州刺史甚有威惠吏人懷
之在任數年蠻夷歸之者三萬餘戶朝議嘉之就拜大
將軍後歷襄仁二州總管並有能名及高祖為丞相授

信州總管部內夷獠猶有未賓長述討平之進位上大將軍王謙作亂益州遣使致書於長述因執其使上其書又陳取謙之策上大悅前後賜黃金五百兩授行軍總管率衆討謙以功進位柱國開皇初復獻平陳之計修營戰艦為上流之師上善其能頻加賞勞下書曰每覽高策深相嘉歎命將之日當以公為元帥也後數歲以行軍總管擊南寧未至道病卒上甚傷惜之令使者弔祭贈上柱國冀州刺史謚曰莊子謨嗣弟軌大業末

東郡通守少子文楷起部郎

李衍

李衍字拔豆遼東襄平人也父弼周太師衍少專武藝
慷慨有志略周太祖時釋褐千牛備身封懷仁縣公加
開府改封普寧縣公遷義州刺史尋從常孝寬鎮玉壁
城數與賊戰敵人憚之及平齊以軍功進授大將軍改
封真鄉郡公拜左宮伯賜雜綵三百匹奴婢二十口賜
子仲威爵浮陽郡公後歷安鄜二州刺史及王謙作亂

高祖以衍為行軍總管從梁睿擊平之進位上大將軍
賜縑二千匹開皇元年又以行軍總管討叛蠻平之進
位柱國賜帛二千匹尋檢校利州總管事明年突厥犯
塞以行軍總管率衆討之不見虜而還轉介州刺史後
數年朝廷將有事江南詔衍於襄州道營戰船及大舉
伐陳授行軍總管從秦王俊出襄陽道以功賜帛三千
匹米六百石拜安州總管頗有惠政歲餘以疾還京師
卒於家時年五十七子仲威嗣衍弟子長雅尚高祖女

襄國公主襲父綸爵為河陽郡公開皇初拜將軍散騎
常侍歷內史侍郎河州刺史檢校秦州總管行從孫密
別有傳

伊婁謙

伊婁謙字彥恭本鮮卑人也其先代為首長隨魏南遷
祖信中部太守父靈相隆二州刺史謙性忠直善辭令
仕魏為直閣將軍周受禪累遷宣納上士使持節車騎
大將軍武帝將伐齊引入內殿從容謂曰朕將有事戎

馬何者為先謙對曰愚臣誠不足以知大事但偽齊僭
擅跋扈不恭沈溺倡優耽昏翹葉其折衝之將斛律明
月已斃讒人之口上下離心道路仄目若命六師臣之
願也帝大笑因使謙與小司寇拓拔偉聘齊觀豐帝尋
發兵齊王知之令其僕射陽休之責謙曰貴朝盛夏徵
兵馬首何向謙荅曰僕憑式之始未聞興師設復西增
白帝之城東益巴丘之戍人情恒理豈足恠哉謙參軍
高遵以情輸於齊遂拘留謙不遣帝克并州召謙勞之

曰朕之舉兵本俟卿還不圖高遵中為叛逆乖朕宿心
遵之罪也乃執遵付謙任令報復謙頓首請赦之帝曰
卿可聚衆唾面令知愧也謙跪曰以遵之罪又非唾面
之責帝善其言而止謙竟待遵如初其寬厚仁恕皆此
類也尋賜爵濟陽縣伯累遷前驅中大夫大象中進爵
為侯加位開府高祖作相授亳州總管俄徵還京既平
王謙謙耻與逆人同名因爾稱字高祖受禪以彥恭為
左武侯將軍俄拜大將軍進爵為公數年出為澤州刺

史清約自處甚得人和以疾去職吏人攀戀行數百里不絕數歲卒於家時年七十子傑嗣

田仁恭

田仁恭字長貴平涼長城人也父弘周大司空仁恭性寬仁有局度在周以明經為掌式中士後以父軍功賜爵鶉陰子大冢宰宇文護引為中外兵曹後數載復以父功拜開府儀同三司遷中外府掾從護征伐數有戰功改封襄武縣公邑五百戶從武帝平齊加授上開府

進封浙陽郡公增邑二千戶拜幽州總管宣帝時進爵
鴈門郡公高祖為丞相徵拜小司馬進位大將軍從韋
孝寬破尉遲迴於相州拜柱國高祖受禪進上柱國拜
太子太師甚見親重嘗幸其第宴飲極歡禮賜殊厚奉
詔營廟社進爵觀國公增邑通前五千戶未幾拜右武
衛大將軍歲餘卒官時年四十七贈司空謚曰敬子世
師嗣次子德懋在孝義傳時有玉城郡公王景鮮虞縣
公謝慶恩並官至上柱國大義公辛遵及其弟韶並官

至柱國高祖以其俱佐命功臣特加崇貴親禮與仁恭等事皆亡失云

元亨

元亨字德良一名孝才河南洛陽人也父季海魏司徒馮翊王遇周齊分隔季海遂仕長安亨時年數歲與母季氏在洛陽齊神武帝以亨父在關西禁錮之其母則魏司空李充之女也素有智謀遂詐稱凍餒請就食於滎陽齊人以其去關西尚遠老婦弱子不以為疑遂許

之李氏陰託大豪李長壽攜亨及孤姪八人潛行草間
得至長安周太祖見而大悅以亨功臣子甚優禮之亨
年十二魏恭帝在儲宮引為交友釋褐千牛備身大統
末襲爵馮翊王邑千戶授拜之日悲慟不能自勝俄遷
通直散騎常侍歷武衛將軍勳州刺史改封平涼王周
閔帝受禪例降為公明武時歷隴州刺史御正大夫小
司馬宣帝時為洛陽刺史高祖為丞相遇尉遲迥作亂
洛陽人梁康邢流水等舉兵應迥旬日之間衆至萬餘

州治中王文舒潛與梁康相結將圖亨亨陰知其謀乃
選關中兵得二千人為左右執文舒斬之以兵襲擊梁
康邢流水皆破之高祖受禪徵拜太常卿增邑七百戶
尋出為衛州刺史加大將軍衛土俗薄亨以威嚴鎮之
在職八年風化大洽後以老病表乞骸骨吏人詣闕上
表請留卧治上嗟歎者久之其年亨以篤疾重請還京
上令使者致醫藥問動靜相望於道歲餘卒於家時年
六十九謚曰宣

杜整

杜整字皇甫京兆杜陵人也祖盛魏直閣將軍潁川太守父闢渭州刺史整少有風槩九歲丁父憂哀毀骨立事母以孝聞及長驍勇有膂力好讀孫吳兵法魏大統末襲爵武鄉侯周太祖引為親信後事宇文護子中山公訓甚被親遇俄授都督明帝時為內侍上士累遷儀同三司拜武州刺史從武帝平齊加上儀同進爵平原縣公邑千戶入為勳曹中大夫高祖為丞相進位開府

及受禪加上開府進封長廣郡公俄拜左武衛將軍在
職數年以母憂去職起令視事開皇六年突厥犯塞詔
遣魏王爽總戎北伐以整為行軍總管兼元帥長史至
合川無虜而還整密進取陳之策上善之於是以行軍
總管鎮襄陽尋病卒時年五十五高祖聞而傷之贈帛
四百匹米四百石謚曰襄子楷嗣官至開府整弟肅亦
少有志行開皇初為通直散騎常侍北地太守

李徹

李徹字廣達朔方巖綠人也父和開皇初為柱國徹性剛毅有器幹偉容儀多武藝大冢宰宇文護引為親信尋拜殿中司馬累遷奉車都尉護以徹謹厚有才具甚禮之護子中山公訓為蒲州刺史護令徹以本官從焉未幾拜車騎大將軍儀同三司武帝時從皇太子西征吐谷渾以功賜爵同昌縣男邑三百戶從帝拔晉州及帝班師徹與齊王憲屯鷄栖原齊王高緯以大軍至憲引兵西上以避其鋒緯遣其驍將賀蘭豹子率勁騎躡

憲戰於晉州城北憲師敗徹與楊素宇文慶等力戰憲
軍賴以獲全復從帝破齊師於汾北乘勝下高壁拔晉
陽擒高潛於冀州俱有力焉錄前後功加開府別封蔡
陽縣公邑千戶宣帝即位從韋孝寬略定淮南每為先
鋒及淮南平即授淮州刺史安集初附甚得其歡心高
祖受禪加上開府轉雲州刺史歲餘徵為左武衛將軍
及晉王廣之鎮并州也朝廷妙選正人有文武才幹者
為之寮佐上以徹前代舊臣數持軍旅詔徹總晉王府

軍事進爵齊安郡公時蜀王秀亦鎮益州上謂侍臣曰
安得文同王子相武如李廣達者乎其見重如此明年
突厥沙鉢略可汗犯塞上令衛王爽為元帥率衆擊之
以徹為長史遇虜於白道行軍總管李充言於爽曰周
齊之世有同戰國中夏力分其來久矣突厥每侵邊諸
將輒以全軍為計莫能死戰由是突厥勝多敗少所以
每輕中國之師今者沙鉢略悉國內之衆屯據要險必
輕我而無備精兵襲之可破也爽從之諸將多以為疑

唯徹獎成其計請與同行遂與充率精騎五千出其不
意掩擊大破之沙鉢略棄所服金甲潛草中而遁以功
加上大將軍沙鉢略因此屈膝稱藩未幾沙鉢略為阿
拔所侵上疏請援以徹為行軍總管率精騎一萬赴之
阿拔聞而遁去及軍還復領行軍總管屯平涼以備胡
寇封安道郡公開皇十年進位柱國及晉王廣轉牧淮
海以徹為揚州總管司馬改封德廣郡公尋徙封城陽
郡公其後突厥犯塞徹復領行軍總管擊破之左僕射

高頰之得罪也以徹素與頰相善因被踈忌不復任使後出怨言上聞而召之入卧内賜宴言及平生因遇鳩而卒大業中其妻宇文氏為孽子安遠誣以呪詛伏誅

崔彭

崔彭字子彭博陵安平人也祖楷魏殷州刺史父謙周荊州總管彭少孤事母以孝聞性剛毅有武略工騎射善周官尚書略通大義周武帝時為侍伯上士累轉門正上士及高祖為丞相周陳王純鎮齊州高祖恐純為

變遣彭以兩騎徵純入朝彭未至齊州三十里因詐病
止傳舍遣人謂純曰天子有詔書至王所彭苦疾不能
強步願王降臨之純疑有變多將從騎至彭所彭出傳
舍迎之察純有疑色恐不就徵因詐純曰王可避人將
密有所道純麾從騎彭又曰將宣詔王可下馬純遽下
彭顧其騎士曰陳王不從詔徵可執也騎士因執而鎖
之彭乃大言曰陳王有罪詔徵入朝左右不得輒動其
從者愕然而去高祖見而大悅拜上儀同及踐阼遷監

門郎將兼領右衛長史賜爵安陽縣男數歲轉車騎將軍俄轉驃騎恒典宿衛性謹密在省闈二十餘年每當上在仗危坐終日未嘗有怠惰之容上甚嘉之上每謂彭曰卿當上日我寢處自安又嘗曰卿弓馬固以絕人頗知學不彭曰臣少愛周禮尚書每於休沐之暇不敢廢也上曰試為我言之彭因說君臣戒慎之義上稱善觀者以為知言後加上開府遷備身將軍上嘗宴達頭可汗使者於武德殿有鴿鳴於梁上上命彭射之既發

而中上大悅賜錢一萬及使者反可汗復遣使於上曰
請得崔將軍一與相見上曰此必善射聞於虜庭所以
來請耳遂遣之及至匈奴中可汗召善射者數十人因
擲肉於野以集飛鳶遣其善射者射之多不中復請彭
射之彭連發數矢皆應弦而落突厥相顧莫不歎服可
汗留彭不遣百餘日上賂以繒綵然後得歸仁壽末進
爵安陽縣公邑二千戶煬帝即位遷左領軍大將軍從
幸洛陽彭督後軍時漢王諒初平餘黨往往屯聚令彭

率衆數萬鎮過山東復領慈州事帝以其清賜絹五百匹未幾而卒時年六十三帝遣使弔祭贈大將軍謚曰肅子寶德嗣

史臣曰王長述等或出總方岳或入司禁旅咸著聲績以功名終有以取之也伊婁謙志量弘遠不念舊惡請赦高遵之罪有國士之風焉崔彭巡警嚴廊毅然難犯禦侮之寄有足稱乎

隋書卷五十四

隋書卷五十四考證

崔彭傳及踐阼○監本阼作祚按曲禮踐阼臨祭祀䟽
阼主人階天子祭祀升阼階

隋書卷五十四考證

欽定四庫全書

隋書卷五十五

唐 特 進 臣 魏 徵 上

列傳第二十

杜彥

杜彥雲中人也父遷屬葛榮之亂徙家於幽彥性勇果
善騎射仕周釋褐左侍上士後從柱國陸通擊陳將吳
明徹於土州破之又擊叛蠻尅倉追白楊二柵并斬其

渠帥進平郢州賊帥樊志以戰功拜大都督尋遷儀同
治隆山郡事明年拜隴州刺史賜爵永安縣伯高祖為
丞相從韋孝寬擊尉迴於相州每戰有功賜物三千段
奴婢三十口進位上開府改封襄武縣侯拜魏郡太守
開皇初授丹州刺史進爵為公後六歲徵為左武衛將
軍平陳之役以行軍總管與新義公韓擒相繼而進軍
至南陵賊屯據江岸彥遣儀同樊子蓋率精兵擊破其
柵獲船六百餘艘渡江擊南陵城拔之擒其守將許翼

進至新林與擒合軍及陳平賜物五千段粟六千石進
位柱國賜予寶安爵昌陽縣公高智慧等之作亂也復
以行軍總管從楊素討之別解江州圍智慧餘黨往往
屯聚保投溪洞彥水陸兼進攻錦山陽父若石壁四洞
悉平之皆斬其渠帥賊李陔擁衆數千據彭山彥襲擊
破之斬陔傳其首又擊徐州宜豐二洞悉平之賜奴婢
百餘口拜洪州總管甚有治名歲餘雲州總管賀婁子
幹卒上悼惜者久之因謂侍臣曰榆林國之重鎮安得

子幹之輩乎後數日上曰吾思可以鎮榆林者莫過杜彥於是徵拜雲州總管突厥來寇彥輒擒斬之北夷畏憚胡馬不敢至塞後數年朝廷復追錄前功賜子寶虔爵承縣公十八年遼東之役以行軍總管從漢王至營州上以彥曉習軍旅令總統五十營事及還拜朔州總管突厥復寇雲州上令楊素擊走之是後猶恐為邊患以彥素為突厥所憚復拜雲州總管未幾以疾徵還卒時年六十子寶虔大業末文城郡丞

高勣

高勣字敬德渤海脩人也齊太尉清河王岳之子也幼聰敏美風儀以仁孝聞為齊祖所愛年七歲襲爵清河王十四為青州刺史歷右衛將軍領軍大將軍祠部尚書開府儀同三司改封樂安王性剛直有才幹甚為時人所重斛律明月雅敬之每有征伐則引之為副遷侍中尚書右僕射及後主為周師所敗勣奉太后歸鄴時宦官放縱儀同荀子溢尤稱寵幸勣將斬之以徇太后

救之乃釋劉文殊竊謂勸曰子溢之徒言成禍福何得如此勸攘袂曰今者西寇日侵朝貴多叛正由此輩弄權致使衣冠解體若得今日殺之明日受誅無所恨也文殊甚愧既至鄴勸勸後主五品以上家累悉置三臺之上因脅之曰若戰不捷則燒之此輩惜妻子必當死戰可敗也後主不從遂棄鄴東遁勸恒後殿為周軍所得武帝見之與語大悅因問齊亡所由勸發言流涕悲不自勝帝亦為之改容授開府儀同三司高祖為丞相

謂勸曰齊所以亡者由任邪佞公父子忠良聞於鄰境
宜善自愛勸再拜謝曰勸亡齊未屬世荷恩榮不能扶
危定傾以致淪覆既蒙獲宥恩幸已多況復濫叨名位
致速官謗高祖甚器之以勸檢校揚州事後拜楚州刺
史民安之先是城北有伍子胥廟其俗敬鬼祈禱者必
以牛酒至破產業勸歎曰子胥賢者豈宜損百姓乎乃
告諭所部自此遂止百姓賴之七年轉光州刺史上取
陳五策又上表曰臣聞夷凶翦暴王者之懋功取亂侮

亡往賢之雅誥是以苗民逆命爰興兩階之舞有扈不
賓終召六師之伐皆所以寧一寓內匡濟羣生者也自
昔晉氏失馭天網絕維群凶於焉蝟起三方因而鼎立
陳氏乘其際運拔起細微清瑱縱其長蛇竊據吳會叔
寶肆其昏虐毒被金陵數年已來荒悖滋甚牝雞司旦
昵近姦回尚方役徙積骸千數疆場防守長戍三年或
微行暴露沉湎王侯之宅或奔馳駿騎顛墜康衢之首
有功不賞無辜獲戮烽燧日警未以為虞耽淫靡慢不

知紀極天厭亂德妖實人興或空裏時有犬聲或行路
共傳鬼怪或剗人肝以祠天狗或自捨身以厭妖訛民
神怨憤災異荐發天時人事昭然可知臣以庸才猥蒙
朝寄頗歷藩任與其鄰接密邇仇讐知其動靜天討有
罪此即其時若戎車雷動戈船電邁臣雖駑怯請效鷹
犬高祖覽表嘉之荅以優詔及大舉伐陳以勦為行軍
總管從宜陽公王世積下陳江州以功拜上開府賜物
三千段隴右諸羌數為寇亂朝廷以勦有威名拜洮州

刺史下車大崇威惠民夷悅附其山谷間生羌相率詣
府稱謁前後至者數千餘戶豪猾屏迹路不拾遺在職
數年稱為治理後遇吐谷渾來寇勦遇疾不能拒戰賊
遂大掠而去憲司奏勦亡失戶口又言受羌饋遺竟坐
免官後卒於家時年五十六子士廉最知名

尒朱敞

尒朱敞字乾羅秀容契胡人尒朱榮之族子也父彥伯
官至司徒博陵王齊神武帝韓陵之捷盡誅尒朱氏敞

小隨母養於宮中及年十二自竇而走至於大街見童
兒群戲者敞解所著綺羅金翠之服易衣而遁追騎尋
至初不識敞便執綺衣兒比究問知非會日已暮由是
得免遂入一村見長孫氏媪踞胡床而坐敞再拜求哀
長孫氏愍之藏於複壁三年購之愈急迹且至長孫氏
曰事急矣不可久留資而遣之遂詐為道士變姓名隱
嵩山略涉經史數年之間人頗異之嘗獨坐巖石之下
泣然而歎曰吾豈終於此乎伍子胥獨何人也於是間

行微服西歸於周太祖見而禮之拜大都督行臺郎中
封靈壽縣伯邑千五百戶遷通直散騎常侍轉車騎大
將軍儀同三司進爵為侯保定中遷使持節驃騎大將
軍開府儀同三司天和中增邑五百戶歷信臨熊潼四
州刺史進爵為公武帝東征上表求從許之攻城陷陣
所當皆破進位上開府除南光州刺史入為護軍大將
軍歲餘轉膠州刺史於是迎長孫氏及弟置於家厚資
給之高祖受禪改封邊城郡公黔安蠻叛命啟討平之

師旋拜金州總管尋轉徐州總管在職數年號為明肅
民吏懼之後以年老上表乞骸骨賜二馬輅車歸於河
內卒於家時年七十二子最嗣

周搖

周搖字世安其先與後魏同源初為普乃氏及居洛陽
改為周氏曾祖拔拔祖右六肱俱為北平王父恕延歷
行臺僕射南荊州總管搖少剛果有武藝性謹厚動遵
法度仕魏官至開府儀同三司周閔帝受禪賜姓車非

氏封金水郡公歷鳳楚二州刺史吏民安之從帝平齊
每戰有功超授柱國進封夔國公未幾拜晉州總管時
高祖為定州總管文獻皇后自京師詣高祖路經搖所
主禮甚薄既而白后曰公解甚富於財限法不敢輒費
又王臣無得効私其質直如此高祖以其奉法每嘉之
及為丞相徙封濟北郡公尋拜豫州總管高祖受禪復
姓周氏開皇初突厥寇邊燕薊多被其患前總管李崇
為虜所殺上思所以鎮之臨朝曰無以加周搖者拜為

幽州總管六州五十鎮諸軍事。擢修鄣塞，謹斥候，邊民以安。後六載，徙為壽州。初，自以年老乞骸骨，上召之，既引見，上勞之曰：「公積行累仁，歷仕三代，克終富貴，保茲遐壽，良足善也。」賜坐褥，歸於第。歲餘，終於家。謚曰恭，時年八十四。

獨孤楷

獨孤楷，字脩則，不知何許人也。本姓李氏，父屯從齊神武帝，與周師戰於沙苑，齊師敗績，因為柱國。獨孤信所

擒配為士伍給使信家漸得親近因賜姓獨孤氏楷少
謹厚便弄馬槊為宇文護執刀累轉車騎將軍其後數
從征伐賜爵廣阿縣公邑千戶拜右侍下大夫周末從
韋孝寬平淮南以功賜子景雲爵西河縣公高祖為丞
相進授開府每督親信兵及受禪拜右監門將軍進封
汝陽郡公數歲遷右衛將軍仁壽初出為原州總管時
蜀王秀鎮益州上徵之猶豫未發朝廷恐秀生變拜楷
益州總管馳傳代之秀果有異志楷諷諭久之乃就路

楷察秀有悔色因勒兵為備秀至興樂去益州四十餘里將反襲楷密令左右覘所為知楷不可犯而止楷在益州甚有惠政蜀中父老于今稱之煬帝即位轉并州總管遇疾喪明上表乞骸骨帝曰公先朝舊臣歷職二代高風素望卧以鎮之無勞躬親簿領也遣其長子凌雲監省郎事其見重如此數載轉長平太守未視事而卒謚曰恭子凌雲平雲彥雲皆不知名楷弟盛見誠節

傳

乞伏慧

乞伏慧字令和馬邑鮮卑人也祖周魏銀青光祿大夫
父纂金紫光祿大夫並為第一領民酋長慧少慷慨有
大節便弓馬好鷹犬齊文襄帝時為行臺左丞加蕩寇
將軍累遷右衛將軍太僕卿自永寧縣公封宜民郡王
其兄貴和又以軍功為王一門二王稱為貴顯周武平
齊授使持節開府儀同大將軍拜伏飛右旅下大夫轉
熊渠中大夫高祖為丞相從韋孝寬擊尉惇於武陟所

當皆破授大將軍賜物八百段及平尉迴進位柱國賜
爵西河郡公邑三千戶賚物二千三百段請以官爵讓
兄朝廷不許論者義之高祖受禪拜曹州刺史曹土舊
俗民多姦隱戶口簿帳恒不以實慧下車按察得戶數
萬遷涼州總管先是突厥屢為寇抄慧於是嚴警烽燧
遠為斥候虜亦素憚其名竟不入境歲餘轉齊州刺史
得隱戶數千遷壽州總管其年左轉杞州刺史在職數
年遷徐州總管時年逾七十上表求致仕不許俄轉荆

州總管又領潭桂二州總管三十一州諸軍事其俗輕
剽慧躬行樸素以矯之風化大洽曾見人以簞捕魚者
出絹買而放之其仁心如此百姓美之號其處曰西河
公簞轉秦州總管煬帝即位為天水太守大業五年征
吐谷渾郡濱西境民苦勞役又遇帝西巡坐為道不整
獻食踈薄帝大怒命左右斬之見其無髮乃釋除名為
民卒於家

張威

張威不知何許人也父琛魏弘農太守威少個儻有大志善騎射膂力過人在周數從征伐位至柱國京兆尹封長壽縣公邑千戶王謙作亂高祖以威為行軍總管從元帥梁睿擊之軍次通谷謙守將李三王擁勁兵拒守睿以威為先鋒三王初閉壘不戰威令人詈侮以激怒之三王果出陣威令壯士奮擊三王軍潰大兵繼至於是擒斬四千餘人進至開遠謙將趙儼衆十萬連營三十里威鑿山通道自西嶺攻其背儼遂敗走追至成

都與謙大戰威將中軍及謙平進位上柱國拜瀘州總管高祖受禪歷幽洛二州總管改封晉熙郡公尋拜河北道行臺僕射後督晉王軍府事數年拜青州總管賜錢八十萬米五百石雜綵三百段威在青州頗治產業遣家奴於民間鬻蘆菴根其奴緣此侵擾百姓上深加譴責坐廢於家後從上祠太山至洛陽上謂威曰自朕之有天下每委公以重鎮可謂推赤心矣何乃不脩名行唯利是視豈直孤負朕心亦且累卿名節因問威曰

公所執笏今安在威頓首曰臣負罪虧憲無顏復執謹
藏於家上曰可持來威明日奉笏以見上曰公雖不遵
法度功效實多朕不忘之今還公笏於是復拜洛州刺
史後封睢城郡公尋轉相州刺史卒官有子植大業中
至武賁郎將

和洪

和洪汝南人也少有武力勇烈過人周武帝時數從征
伐以戰功累遷車騎大將軍儀同三司時龍州蠻任公

忻李國立等聚眾為亂刺史獨孤善不能禦朝議以洪
有武略代善為刺史月餘擒公忻國立皆斬首梟之餘
黨悉平從帝攻河陰洪力戰陷其西門帝壯之賞物千
段復從帝平齊進位上儀同賜爵北平侯邑八百戶拜
左勳曹下大夫柱國王軌之擒吳明徹也洪有功焉加
位開府遷折衝中大夫尉迴作亂相州以洪為行軍總
管從韋孝寬擊之軍至河陽迴遣兵圍懷州洪與總管
宇文述等擊走又破尉惇於武陟及平相州每戰有功

拜柱國封廣武郡公邑二千戶前後賜物萬段奴婢五十口金銀各百挺牛馬百匹時東夏初平物情尚梗高祖以洪有威名令領冀州事甚得人和數歲徵入朝為漕渠總管監轉拜泗州刺史屬突厥寇邊詔洪為北道行軍總管擊走虜至磧而還後遷徐州總管卒時年六

十四

侯莫陳穎

侯莫陳穎字遵道代人也與魏南遷世為列將父崇魏

周之際歷職顯要官至大司空穎少有器量風神警發
為時輩所推魏大統末以父軍功賜爵廣平侯累遷開
府儀同三司周武帝時從滕王道擊龍泉文城叛胡與
柱國豆盧勣各帥兵分路而進穎懸軍五百餘里破其
三柵先是稽胡叛亂輒略邊人為奴婢至是詔胡敢有
壓匿良人者誅籍沒其妻子有人言為胡村所隱匿者
勣將誅之穎謂勣曰將在外君命有所不行諸胡固非
悉反但相迫脅為亂耳大兵臨之首亂者知懼脅從者

思降今漸加撫慰自可不戰而定如即誅之轉相驚恐
為難不細未若召其渠帥以隱匿者付之令自歸首則
羣胡可安勸從之羣胡感悅爭來降附北土以安遷司
武加振威中大夫高祖為丞相拜昌州刺史會受禪竟
不行加上開府進爵昇平郡公俄拜延州刺史數年轉
陳州刺史平陳之後以行軍總管從秦王俊出魯山道
屬陳將荀法尚陳紀降頴與行軍總管段文振度江安
集初附尋拜饒州刺史未之官遷瀛州刺史甚有惠政

在職數年坐與秦王俊交通免官百姓將送者莫不流涕因相與立碑頌穎清德未幾檢校汾州事俄拜邢州刺史仁壽中吏部尚書牛弘持節巡撫山東以穎為第一高祖嘉歎優詔褒揚時朝廷以嶺南刺史縣令多貪鄙蠻夷怨叛妙簡清吏以鎮撫之於是徵穎入朝及進見上與穎言及平生以為歡笑數日進位大將軍拜桂州總管十七州諸軍事賜物而遣之及到官大崇恩信民夷悅服溪洞生越多來歸附煬帝即位穎兄梁國公

芮坐事徙邊朝廷恐頴不自安徵歸京師數年拜恒山
太守其年嶺南閩越多不附帝以頴前在桂州有惠政
為南土所信伏復拜南海太守後四歲卒官謚曰定子
虔會最知名

史臣曰杜彥東夏南服屢有戰功作鎮朔垂胡塵不起
高勩死亡之際志氣凜然疾彼姦邪致茲餘慶尔朱敞
幼有權竒終能止足崇基墜而復構不亦仁且智乎周
搖以質實見知獨孤以恤人流譽乞伏慧能以國讓侯

莫陳所居治理或知牧人之道或踐仁義之路皆有可稱焉慧以供帳不厚至於放黜並結髮登朝出入三代終享祿位不天性靈蓋其任心而行不為矯飾之所致也

隋書卷五十五

欽定四庫全書

隋書卷五十六

唐 特 進 臣 魏 徵 上

列傳第二十一

盧愷

盧愷字長仁涿郡范陽人也父柔終於魏中書監愷性孝友神情爽悟略涉書記頗解屬文周齊王憲引為記室其後襲爵容城伯邑千一百戶從憲伐齊愷說柏杜

鎮下之遷小吏部大夫增邑七百戶染工上士王神歡者嘗以賂自進冢宰宇文護擢為計部下大夫愷諫曰古者登高能賦可為大夫求賢審官理須詳慎今神歡出自染工更無殊異徒以家富自通遂與搢紳並列實恐惟鷄之刺聞之外境護竟寢其事建德中增邑二百戶歲餘轉內史下大夫武帝在雲陽宮勅諸屯簡老牛欲以享士愷進諫曰昔田子方贖老馬君子以為美談向奉明勅欲以老牛享士有虧仁政帝美其言而止轉

禮部大夫為聘陳使副先是行人多從其國禮及愷為使一依本朝陳人莫能屈四年秋季穆攻拔軹關柏崖二鎮命愷作露布帝讀之大悅曰盧愷文章大進荀景倩故是令君之子尋授襄州總管司錄轉治中大象元年徵拜東京吏部大夫開皇初加上儀同三司除尚書吏部侍郎進爵為侯仍攝尚書左丞每有敷奏侃然正色雖逢喜怒不改其常帝嘉愷有吏幹賜錢二十萬并賚雜綵三百匹加散騎常侍八年上親考百寮以愷為

上愷固讓不敢受高祖曰吏部勤幹舊所聞悉今者上
考僉議攸同當仁不讓何愧之有皆在朕心無勞飾讓
歲餘拜禮部尚書攝吏部尚書事會國子博士何妥與
右僕射蘇威不平奏威陰事愷坐與相連上以愷屬吏
憲司奏愷曰房恭懿者尉遲迥之黨不當任進威愷二
人曲相薦達累轉為海州刺史又吏部預選者甚多愷
不即授官皆注色而遣威之從父弟徹肅二人並以鄉
正徵詣吏部徹文狀後至而先任用肅左足攣蹇才用

無算愷以威故授朝請郎愷之朋黨事甚明白上大怒
曰愷敢將天官以為私惠愷免冠頓首曰皇太子將以
通事舍人蘇夔為舍人夔即蘇威之子臣以夔未當遷
固啟而止臣若與威有私豈當如此上曰蘇威之子朝
廷共知卿乃固執以徼身倖至所不知者便行朋附姦
臣之行也於是除名為百姓未幾卒于家自周氏以降
選無清濁及愷攝吏部與薛道衡陸彥師等甄別士流
故涉黨固之譖遂及於此子義恭嗣

令狐熙

令狐熙字長熙燉煌人也代為西州豪右父整仕周官至大將軍始豐二州刺史熙性嚴重有雅量雖在私室終日儼然不妄通賓客凡所交結必一時名士博覽羣書尤明三禮善騎射頗知音律起家以通經為吏部上士尋授都督輔國將軍轉夏官府都上士俱有能名以母憂去職殆不勝喪其父戒之曰大孝在於安親義不絕嗣吾今見存汝又隻立何得過爾毀頓貽吾憂也熙

自是稍加饘粥服闋除小駕部復丁父憂非杖不起人
有聞其哭聲莫不為之下泣河陰之役詔令墨纒從事
還授職方下大夫襲爵彭陽縣公邑二千一百戶及武
帝平齊以留守功增邑六百戶進位儀同厯司勳吏部
二曹中大夫甚有當時之譽高祖受禪之際熙以本官
行納言事尋除司徒左長史加上儀同進爵河南郡公
時吐谷渾寇邊以行軍長史從元帥元諧討之以功進
位上開府會蜀王秀出鎮於蜀綱紀之選咸屬正人以

熙為益州總管長史未之官拜滄州刺史時山東承齊之弊戶口簿籍類不以實熙曉諭之令自歸首至者一萬戶在職數年風教大洽稱為良二千石開皇四年上幸洛陽熙來朝吏民恐其遷易悲泣於道及熙復還百姓出境迎謁歡叫盈路在州獲白鳥白麋嘉麥甘露降於庭前柳樹八年徙為河北道行臺度支尚書吏民追思相與立碑頌德及行臺廢授并州總管司馬後徵為雍州別駕尋為長史遷鴻臚卿後以本官兼吏部尚書

往判五曹尚書事號為明幹上甚任之及上祠太山還
次汴州惡其殷盛多有姦俠於是熙為汴州刺史下
車禁游食抑工商民有向街開門者杜之船客停於郭
外星居者勒為聚落僑人逐令歸本其有滯獄並決遣
之令行禁止稱為良政上聞而嘉之顧謂侍臣曰鄴都
天下難理處也勅相州刺史豆盧通令習熙之法其年
來朝考績為天下之最賜帛三百匹頒告天下上以嶺
南夷越數為反亂徵拜桂州總管十七州諸軍事許以

便宜從事刺史以下官得承制補授給帳內五百人賜帛五百匹發傳送其家累改封武康郡公熙至部大弘恩信其溪洞渠帥更相謂曰前時總管皆以兵威相脅今者乃以手教相諭我輩其可違乎於是相率歸附先是州縣生梗長吏多不得之官寄政于總管府熙悉遣之為建城邑開設學校華夷感敬稱為大化時有甯猛力者與陳後主同日生自言貌有貴相在陳日已據南海平陳後高祖因而撫之即拜安州刺史然驕倨恃其

阻險未嘗參謁熙手書諭之申以交友之分其母有疾
熙復遺以藥物猛力感之詣府請謁不敢為非熙以州
縣多有同名者於是奏改安州為欽州黃州為峯州利
州為智州德州為驩州東寧為融州上皆從之在職數
年上表曰臣忝寄嶺表四載于茲犬馬之年六十有一
才輕任重愧懼兼深常願收拙避賢稍免官謗然所管
遐曠綏撫尤難雖近能頓革夷風頗亦漸識皇化但臣
夙患消渴比更增甚筋力精神轉就衰邁昔在壯齒猶

不如人況今年疾俱侵豈可猶當重寄請解所任優詔
不許賜以醫藥熙奉詔令交州渠帥李佛子入朝佛子
欲為亂請至仲冬上道熙意在羈縻遂從之有人詣闕
訟熙受佛子賂而捨之上聞而固疑之既而佛子反問
至上大怒以為信然遣使者鎖熙詣闕熙性素剛鬱鬱
不得志行至永州憂憤發病而卒時年六十三上怒不
解於是沒其家財及行軍總管劉方擒佛子送於京師
言熙實無贓貨上乃悟於是召其四子聽預仕焉少子

德茶最知名

薛胄

薛胄字紹玄河東汾陰人也父端周蔡州刺史胄少聰
明每覽異書便曉其義常歎訓注者不會聖人深旨輒
以意辯之諸儒莫不稱善性慷慨志立功名周明帝時
襲爵文城郡公累遷上儀同尋拜司金大夫後加開府
高祖受禪擢拜魯州刺史未之官檢校廬州總管事尋
除兗州刺史及到官繫囚數百胄剖斷旬日便了囹圄

空虛有陳州人向道力者偽作高平郡守將之官曹遇諸塗察其有異將留詰之司馬王君馥固諫乃聽詣郡既而悔之即遣主簿追禁道力有部人徐俱羅者嘗任海陵郡守先是已為道力偽代之比至秩滿公私不悟俱羅遂語君馥曰向道力以經代俱羅為郡使君豈容疑之君馥以俱羅所陳又固請曹曹呵君馥曰吾已察知此人詐也司馬容姦當連其坐君馥乃止遂往收之道力懼而引偽其發姦摘伏皆此類也時人謂為神明

先是兗州城東沂泗二水合而南流汎濫大澤中胄遂積石堰之使決令西注陂澤盡為良田又通轉運利盡淮海百姓賴之號為薛公豐兗渠胄以天下太平登封告禪帝王盛烈遂遣博士登太山觀古跡撰封禪圖及儀上之高祖謙讓不許後轉郢州刺史前後俱有惠政徵拜衛尉卿尋轉大理卿持法寬平名為稱職後遷刑部尚書時左僕射高頴稍被疎忌及王世積之誅也頴事與相連上因此欲成頴罪胄明雪之正議其獄由是

忤旨械繫之久而得免檢校相州事甚有能名會漢王諒作亂并州遣偽將綦良東略地攻逼慈州刺史上官政請援於曹曹畏諒兵鋒不敢拒良又引兵攻曹曹欲以計却之遣親人魯世範說良曰天下事未可知曹為人臣去就須得其所何遽相攻也良於是釋去進圖黎陽及良為史祥所攻棄軍歸曹朝廷以曹懷貳心鎖詣大理相州吏人素懷其恩詣闕理曹者百餘人曹竟坐除名配防嶺南道病卒有子筠獻並知名

宇文弼

宇文弼字公輔河南洛陽人也其先與周同出祖直力
覲魏鉅鹿太守父玆周宕州刺史弼慷慨有大節博學
多通仕周為禮部上士嘗奉使鄧至國及黑水龍涸諸
羌前後降附三十餘部及還奉詔修定五禮書成奏之
賜公田十二頃粟百石累遷少吏部擢八人為縣令皆
有異績時以為知人轉內史都上士武帝將出兵河陽
以伐齊謀及臣下弼進策曰齊氏建國于今累葉雖曰

無道藩屏之寄尚有其人今之用兵須擇其地河陽衝要精兵所聚盡力攻圍恐難得志如臣所見彼汾之曲成小山平攻之易拔用武之地莫過於此願陛下詳之帝不納師竟無功建德五年大舉伐齊卒用弼計弼於是募三輔豪俠少年數百人以為別隊從帝攻拔晉州身被三瘡苦戰不息帝竒而壯之後從帝平齊以功拜上儀同封武威縣公邑千五百戶賜物千五百段奴婢百五十口馬牛羊千餘頭拜司州總管司錄宣帝嗣位

遷左守廟大夫時突厥寇甘州帝令侯莫陳昶率兵擊之昶為監軍昶謂昶曰黠虜之勢來如激矢去若絕絃若欲追躡良為難及且宜選精騎直趨祈連之西賊若收軍必自蓼泉之北此地險隘兼復下濕度其人馬三日方度緩轡追討何慮不及彼勞我逸破之必矣若邀此路真上策也昶不能用之西取合黎大軍行遲虜已出塞其年昶又率兵從梁士彥攻拔壽陽尋改封安樂縣公增邑六百戶賜物六百段加以口馬除澧州刺史

俄轉南司州刺史後司馬消難之奔陳也弼追之不及
遇陳將樊毅戰於漳口自旦及午三戰三捷虜獲三千
人除黃州刺史尋轉南定州刺史開皇初以前功封平
昌縣公加邑一千二百戶入為尚書右丞時西羌內附
詔弼持節安集之置鹽澤蒲昌二郡而還遷尚書左丞
當官正色為百寮所憚三年突厥寇甘州以行軍司馬
從元帥竇榮定擊破之還除太僕少卿轉吏部侍郎平
陳之役楊素出信州道令弼持節為諸軍節度仍領行

軍總管劉仁恩之破陳將呂仲肅也攷有謀焉加開府
擢拜刑部尚書領太子虞候率上嘗親臨釋奠攷與博
士論議詞致清遠觀者屬目上大悅顧謂侍臣曰朕今
觀周公之制禮見宣尼之論孝實慰朕心於是頒賜各
有差時朝廷以晉陽為重鎮并州總管必屬親王其長
史司馬亦一時高選前長史王韶卒以攷有文武幹用
出為并州長史俄以父艱去職尋詔起之十八年遼東
之役授元帥漢王府司馬仍尋領行軍總管軍還之後

歷朔代吳三州總管皆有能名煬帝即位徵拜刑部尚書仍持節巡省河北還除泉州刺史歲餘復拜刑部尚書尋轉禮部尚書攷既以才能著稱歷職顯要聲望甚重物議時談多見推許帝頗忌之時帝漸好聲色尤勤遠略攷謂高頰曰昔周天元好聲色而國亡以今方之不亦甚乎又言長城之役幸非急務有人奏之竟坐誅死時年六十二天下寃之所著辭賦二十餘萬言為尚書孝經注行於時有子儉瑗

張衡

張衡字建平河內人也祖嶷魏河陽太守父光周萬州
刺史衡幼懷志尚有骨鯁之風年十五詣太學受業研
精覃思為同輩所推周武帝居太后憂與左右出獵衡
露髮輿櫬扣馬切諫帝嘉焉賜衣一襲馬一匹擢拜漢
王侍讀衡又就沈重受三禮略究大旨累遷掌朝大夫
高祖受禪拜司門侍郎及晉王廣為河北行臺衡歷刑
部度支二曹郎後以臺廢拜并州總管掾及王轉牧揚

州衡復為掾王甚親任之衡亦竭慮盡誠事之奪宗之計多衡所建也以母憂去職歲餘起授揚州總管司馬賜物三百段開皇中熙州李英林聚眾反署置百官以衡為行軍總管率步騎五萬人討平之拜開府賜奴婢一百三十口物五百段金銀雜畜稱是及王為皇太子拜衡右庶子仍領給事黃門侍郎煬帝嗣位除給事黃門侍郎進位銀青光祿大夫俄遷御史大夫甚見親重大業三年帝幸榆林郡還至太原謂衡曰朕欲過公宅

可為朕作主人衡於是馳至河內與宗族具牛酒帝上
太行開直道九十里以抵其宅帝悅其山泉留宴三日
因謂衡曰往從先皇拜太山之始塗經洛陽瞻望於此
深恨不得相過不謂今日得諧宿願衡俯伏辭謝奉觴
上壽帝益歡賜其宅傍田三十頃良馬一匹金帶縑絲
六百段衣一襲御食器一具衡固讓帝曰天子所至稱
幸者蓋為此也不足為辭衡復獻食於帝帝令頒賜公
卿下至衛士無不霑洽衡以藩邸之舊恩寵莫與為比

頗自驕貴明年帝幸汾陽宮宴從官特賜絹五百匹帝
欲大汾陽宮令衡與紀弘整具圖奏之衡承間進諫曰
比年勞役繁多百姓疲敝伏願留神稍加折損帝意甚
不平後嘗目衡謂侍臣曰張衡自謂由其計畫令我
天下也時齊王暕失愛於上帝密令人求暕罪失有人
譖暕違制將伊闕令皇甫詡從之汾陽宮又錄前幸涿
郡及祠恒岳時父老謁見者衣冠多不整帝譴衡以憲
司皆不能舉正出為榆林太守明年帝復幸汾陽宮衡

督役築樓煩城因而謁帝帝惡衡不損瘦以為不念咎
因謂衡曰公甚肥澤宜且還郡衡復之榆林俄而勅衡
督役江都宮有人詣衡訟宮監者衡不為理還以訟書
付監其人大為監所困禮部尚書楊玄感使至江都其
人詣玄感稱寃玄感固以衡為不可及與衡相見未有
所言又先謂玄感曰薛道衡真為枉死玄感具上其事
江都丞王世充又奏衡頻減頓具帝於是發怒鎖衡詣
江都市將斬之久而乃釋除名為民放還田里帝每令

親人謁衡所為八年帝自遼東還都衡妄言衡怨望謗訕朝政竟賜盡于家臨死大言曰我為人作何物事而望久活監刑者塞耳促令殺之義寧中以死非其罪贈大將軍南陽郡公謚曰忠有子希玄

楊汪

楊汪字元度本弘農華陰人也曾祖順徙居河東父琛儀同三司及汪貴追贈平鄉縣公汪少凶疎好與人羣關拳所毆擊無不顛踣長更折節勤學專精左氏傳通

三禮解褐周冀王侍讀王甚重之每曰楊侍讀德業優
深孤之穉生也其後問禮於沈重受漢書於劉臻二人
推許之曰吾弗如也由是知名累遷夏官府都上士及
高祖居相引知兵事遷掌朝下大夫高祖受禪賜爵平
鄉縣伯邑二百戶歷尚書司勳兵部二曹侍郎秦州總
管長史名為明幹遷尚書左丞坐事免後歷荆洛二州
長史每聽政之暇必延生徒講授時人稱之數年高祖
謂諫議大夫王達曰卿為我覓一好左丞達遂私於汪

曰我當薦君為左丞若事果當以良田相報也汪以達所言奏之達竟以獲罪卒拜汪為尚書左丞汪明習法令果於剖斷當時號為稱職煬帝即位守大理卿汪視事二日帝將親省囚徒其時繫囚二百餘人汪通宵究審詰朝而奏曲盡事情一無遺誤帝甚嘉之歲餘拜國子祭酒帝令百寮就學與汪講論天下通儒碩學多萃焉論難鋒起皆不能屈帝令御史書其問荅奏之省而大悅賜良馬一匹大業中為銀青光祿大夫及楊玄感

反河南贊治裴弘策出師禦之戰不利弘策出還遇汪而屏人交語既而留守樊子蓋斬弘策以狀奏汪帝疑之出為梁郡通守後李密已逼東都其徒頻寇梁郡汪勒兵拒之頻挫其銳煬帝崩王世充推越王侗為主徵拜吏部尚書頗見親委及世充僭號汪復用事世充平以光黨誅死

史臣曰盧愷諫說可稱令狐熙所居而治薛胄執憲平允宇文弼聲望攸歸張衡以鯁正立名楊汪以學業自

許然皆有善始鮮克令終九仞之基俱傾於一匱惜哉
夫忠為令德施非其人尚或不可況託足邪徑而又不
得其人者歟語曰無為權首將受其咎又曰無始禍無
召亂張衡既召亂源實為權首動不以順其能不及於
此乎

隋書卷五十六

隋書卷五十六考證

史臣贊九仞之基俱傾於一匱○按匱與貫通前漢王莽傳綱紀咸張成在一匱

隋書卷五十六考證